



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL

Komunikadu Imprensa **2 Juñu 2014**

Partisipantes sira iha treinamentu kona-ba demokrasia no prosesu halo lei hosi Suku Holarua-Manufahi husu ba PN atu altera Lei Pensaun Vitalisa

Unidade Programa Observasaun Parlamentár (POP) JSMP continua hala'ó treinamentu ba comunidade iha Suku Holarua, Sub-Same, Distritu Manufahi iha 29 de Maiu 2014. Treinamentu ne'e kobre asuntu importante rua kona-ba demokrasia no kna'ar orgaun soberanu sira nian iha prosesu halo lei.

Partisipante sira ne'ebé partisipa husi estrutura suku, representante fetu rua, representante estudante, joventude fetu no representante comunidade ne'ebé kompostu hosi fetu na'in 20 no mane na'in 10.

“Atividade treinamentu ne'e hanesan atividade kontinuasaun husi JSMP durante ne'e atu habelar informasaun hodi hasa'e koñesimentu konsellu suku no comunidade sira kona-ba demokrasia, kna'ar orgaun soberania no prosesu halo lei Timor-Leste nian”, dehan Diretór Ezekutivu JSMP, Luis de Oliveira Sampaio.

Xefi suku Holarua, Sr. Geraldo P. Araújo lori comunidade sira nia naran agredese ba JSMP tanba bele fahe informasaun importante sira ne'e iha sira nia suku no nia espera katak ho informasaun ne'ebé partisipantes sira hetan bele fahe tutan liutan ba comunidade sira iha aldeia atu bele hatane no kompriende diak liutan informasaun hirak ne'e.

Iha treinamentu ne'e, partisipantes sira hatudu sira nia interesse boot tebes no rekomenda ba JSMP atu bele hato'o sira nia ejizensia ba Parlamentu Nasionál (PN). Partisipantes sira husu atu PN tenki altera Lei Pensaun Vitalisa tuir promesa ne'ebé sira halo iha kampaña politika. Tanba sira rekoñese katak lei ne'e fó benefisiu deit ba orgaun titular estadu nian no iha futuru bele fó impaktu ba gastus orsamentu estadu nian.

Antes ne'e, iha trenamentu ba asuntu hanesan iha Suku Vatu-Boro, Distritu Liquica, ezije atu halo referendum ba Lei Pensaun Vitalisia hodi determina lolos polimika kona-ba lei refere.

“Ne'e manifesta reasaun no sentimentu koletiva povu nian no JSMP hein katak nain ulun sira, sensitivu ho povu ne'ebé sira representa iha Parlamentu Nasionál nia halerik” dehan Diretór Ezekutivu JSMP, Luis de Oliveira Sampaio.

Tuir planu kontinuasaun husi atividade treinamentu ne'e sei realiza iha Distritu Ainaro no treinamentu ne'e realiza tanba hetan apoiu husi UNDEF.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp